

Deuteronomio

Moisésuunoa Cununi Cuscan

Nocon Ifo Diosin Israelifo yononi cuscan
Horeb mai anoashu fotanonfo

1 ¹Tsoa istaipama unu Jordán fari oaiquiri Israelifo icafo ini. Nan mai unu Jordán ocuma futsa ahuun anu Arabá ini. Nannoshon Moisés ahuun yora Israelifo yoini cusca nicanifo. Nan pushu rasi ato chaima icafo. Zuf non Parán non Tofel non Labán non Hazerot non Dizahab. Nan ato nushmancayan Israelifo icafo ini. ²Machi Horeb anoashu fai nan machi Seirhuuri cai once dia oshatan Cades-barnea ano nocotiro ini.

³⁻⁵Moisés ato iyoaitian Israelifoan Amorreofo aton niaifo Sehón Hesbón anoa ato rutunifo. Basánfoan aton niaifo Og nan pushu rasi Astarot ano ica ini. Ascano nan mai anuni Edreiran huani. Israelifo Egipcio mai anoashu funifotian cuarenta fari non tau rafu non tau foshca fusti oshu finoanno unu Jordán fari oaiquiri Moab mai chaimashta inifo. Nantianri nantifi nan cuarenta fari finoanfo cusca nocon Ifo Diosin ato yononi cusca Moisés ahuun caifo Israelifo shinanmani isca huaquin,

⁶Machi Horeb anoshon nocon Ifo Diosin noco yoini isca huaquin, —Na machi ano man iyomisi chain. Natian afanan nuno iyamacahuu. ⁷Natian

maton pano pushufoya fotacahuun Amorreofo nan machifoanno icafo ari fotacahuun. Mai futsan ahuun anu Arabá ano fofain nan ato chaima icafoanri aton mai ari fofain Néguev mai ari fofain unu cusumunri fofain Cananeofo icari fofain Líbano ano fofain nan chai unu Eufrates ari fotacahuun.

⁸Unfin na maitio mato inaincai matona inon. Ascacun natian nanno ichahuun futsafo nannoshon potacahuun matona inon. Un maton shunifo Abraham non Isaac non Jacob aton funafori inanni. Ascano natianri matona iishquiran, —ishon nocon Ifo Diosin noco yoini.

⁹⁻¹⁰Nantian un mato yoini isca huaquin, —Nocon Ifo Diosin mato ichapacoin cainmani. Tsoancai fishifo tanan huatioma. Nanscarifiaquin matoricai tsoan mato tanan huatiroma. Ascano urus fusticai un mato niaifo itiroma mato yonoshquin. ¹¹Nocon shunifoan aton Ifo Diosifin nocon Ifo Diosiriquin. Aafin yoiyoni cusca mato shara huapainon mato afanan facufo non mato funafori ichapacoin inanpainon. ¹²¿Ascafiaca man fochishmanantanainno non nannorisi shinanyamaino ahuuscashomun urus fusti Diosin mato yoipaiyai cusca un yoitiroquin? ¹³Natianfin man manifoti

maton muran icafoquin nocofunufu mapo sharayafo shinansharafain futsafoan atohuunoa shinansharafo nanscarafo catoncahuun. Man nanscaiton un ato yonotiro maton niaifofo inonfo, ishon un mato yoini.

¹⁴Ascaiton man ua cumani isca huaquin, “Ai. Min noco yoia cusca shara. Non futsafo catontiro nocon niaifo patasharinoafu inonfo,” ishon man ua cumani.

¹⁵Ascan man catonni cusca un manifesti nocofunu sharafo nan mapo sharayafo non atohuunoa shinansharamisifo un ato yononi maton niaifofo inonfo mato iquinonfo. Futsafoan mil yora iquinainno futsafoan cien yora iquinainno futsafoan cincuenta yora iquinainno futsafoan mucu rafuti yora iquintiro aton niaifo iishquin.

¹⁶Un ato yoini. “Natian mato manifesti man aton niaifofo iishquin. Futsafo fu fochishmanantanainton ato nicacahuun yoiiafo cusca man ato yoitiro ratofoanmain cayacafi shinaincai. Israelifoan nannorisi shinainma iyamaraimain Israeli yafi caifo futsa fochishmanantanaincai ato nicasharacahuun ato cayacafi yoishquin afanan fochishmanantanonfoma. ¹⁷Niaifo ahuara ichapaya fusti nicayamacahuun. Nocofunu ahuuomafori nicasharacahuun. Nocofunuqui ratuyamacahuun. Diosin mato tapimatiro ratotomain cayacafi yoicain min ato cumasharanon afanan fochishmanantanonfoma. Ascafia futsafo mato yoiia cusca man tapiamaquin ua yoihuun un ato cayacafi yoinon,” ishon un mato yoini.

¹⁸Nantian man atiro cusca un nantifi mato yoini.

Doce nocofunufu Moisés mai futsari ato nichini nan icafo cuscan tapishcaquin

¹⁹Ascan nocon Ifo Diosin noco yononi cusca non Horeb anoashu cani machi

Amorrefo icafoanno non noconon. Nan mai fasi chaca ano tsoa istaipama ano finonfainni cai Cades ano noconi. Man man oinni. ²⁰Non nocoaitian un mato yoini isca huaquin, “Man non nan machifo Amorrefoan aton mai ano noco. Nan mai nocon Ifo Diosin noco inan. ²¹Ascacun nocon Ifo Diosin noco inaintian ‘Nanri fotacahuun na mai shara fiishcaquin,’ ishon nocon Ifoan noco yononi. Ratuyamacahuun. Maton nomuran shinanchacayamacahuun,” ishon un mato yoini. ²²Ascafia man ua cumani isca huaquin, “Iquisi non nocofunufu nan mai shara ari nichiyonon. Nan mai ariashu nocotan noco tapimanonfo rato fai sharapamain non catiroquin noco sharashquin. Rato pushu rasi anomain non nocotiroquin,” ishon ua man yoini.

²³Man ua yoini cusca nicain un shinan shara itiro. Ascacun un doce nocofunufu catonni. Nocon yora nan doce mani futsafoti nocofunu fusti catonpacunonfo nan mai ari nichishquin. ²⁴Ascatan focani machifo finonfaincani machifo nushmancayan ahuun anu Escol ano noconifo. Ascashon nanno oinnifo ahuu cuscaramainquin. ²⁵Oianfo nanno fimi sharafo ichaparasi ini. Ascashon nan nasoaihotian atiri fimifo noco fushonifo noco ismashquin. Ascatan yoinifo isca huaquin, “Na mai nocon Ifo Diosin noco inain sharacoinran,” ishon noco yoinifo. ²⁶Nannori noco yoificatan nocon Ifo Diosin mato yononi cuscacai man huapaima. Man ari focasmai. ²⁷Maton pano pushu muranshon man tsain chaca huafain man tsain chipuni isca huaquin, “Nocon Ifo Diosin noco noicasmai. ¿Ahuuscai Egipcio mai arishon noco nuno ihuuamun Amorrefoan noco rutunon? ²⁸Nocon yorafo na mai anoashu nocoqui chaninifo cusca noco ratumanifo. Noco yoiquin isca huanifo,

‘Nan mai ano icafo fasi cuya masoafomutsisipacoinfo. Noncai ato finontiro. Aton pushu rasi cunu cuyacoin tarati huaafo. Nannori Anac ahuun funafo yora tsoan oinyomisima uhuapacoinfori man non oianran,’ ishon noco yoinifo. Nocon yora nan mucu rafutifain nannori noco yoiquin noco ratumanifo. ¿Ascacun ahuuscaimun non ari catiroquin?” ishon man ua yoini.

²⁹Un nannori nicaquin un mato cumani isca huaquin, “Ratuyamacahuun. ³⁰Non caitian nocon Ifo Diosin noco rucucashoicai. Nantonfin yora futsafo nan mai shara anoshon noco caimashotiroquin ato cuyoshquin. Egipciofohuunoa man oinni cusca nanscarifiai na mai shara anoshori noco ahuamamishti huashoshquin nan yora futsafoan noco ahuusca huanonfoma. ³¹Man man oinmisi tsoa istaipama ano nocon Ifo Diosin noco cushusharamisi. Nan apan ahuun facu ahuaa chaca finononma iyotiro cusca huaquin nanscarifi huaquin nocon Ifo Diosin noco ihuushara non ahua chaca finononma. Nanscacun natian noco nuno ihuuaran,” ishon un mato yoini. ³²Nocon Ifo Diosin noco cushusharamisi cusca un mato yoi sharafiaca man nocon Ifo Diosi icoinra huanima. ³³Non Egipcio mai ariashu oaitian Diosin noco cushusharafain yamutifi noco rusoatori chii urumanhuan nai muranshon noco isma nan noco fu caiton non tapifain noco iyoaiquiri non rani nituimainquin chii urumanhuanun noco tapimani. Ascan shafatifi naicoimanhuan noco rusoatori camisi. Nan nai coinmanhuanhuunshon noco oinmashara non raqui caimancai noco tapimafain ranimain non nituincain noco tapimani.

Nocon Ifo Diosin Israelifoqui sinani

³⁴Ascan man tsain chaca huafain tsain chipua cusca nocon Ifo Diosin nicain

matoqui sinai ahuun tsaincai fianananpacunacama. Ascatan yoiquin isca huani, ³⁵“Manfin yora chacacoinfoquin. Man ua nicacasmamisi. Ascan maton shunifo un yoini cusca na mai shara un ato inannocai mancai na mai shara ano man iquipacunacama. Man foanfainnisi nai cuyoshquin. ³⁶Ascafia nan Jefone facu Caleb fusti iquitiro. Nantofin ua nica sharamisiquin. Ascashu arus fusti iquitiro. Naanfin nan mai oian cusca un inaincai ahuuna non ahuun funafonari inon,” ishon nocon Ifo Diosin yoini.

³⁷Matohuunoashu nocon Ifo Diosin uquiri sinaquin. Ua yoini isca huaquin, “Minricai na mai shara ano iquitiro. ³⁸Min nanno iquitamarocon mia ashomisi cusca nan Nunpan ahuun facu Josué nan mai shara ano iishquiquin. Nantofin maton caifo iyoshquiquin nan mai shara fiishcaquin atona inon. Ascacun ahuun nomuran unimamahuun. Josué tsain shara yoihuu min caifo Israelifo iyoaitian ratuquima ua icoinra huashquinon,” ishon Ifo Diosin ua yoini. ³⁹Ascano afanan nocon Ifo Diosin mato yoini isca huaquin, “Man yoini maton facufo yafi maton ainfofo futsafoan ihuishquicani aton yonomati inonfo. Nannori man yoifiaca maton facu yomumishtifoan tapiataima ahuaa shara iyamarai chaca. Nanfofin na mai shara ano iishquicaniquin. Un mato na mai shara ano iquimatamarocon maton facufo un ato iquimashquin atona inon. ⁴⁰Manfin natian unuhuan oshin fai ari tsoa istaipama anoashu nasofaitacahuun,” ishon nocon Ifo Diosin noco yoini.

**Israelifoan amaquiri shinainfoan
Amorrefo futan Cananeofan atirifi
rutufain atirifi ato ichonifo**

⁴¹Nannori nicatan man ua cumani isca huaquin, “Man nonfin Diosi chaca

huaquin. Ascafia nocon Ifo Diosin noco yononi cusca natian non aashquicai. Nonfin nan mai ari caicain yora futsafo rutushquin,” ishon man yoini. Maton ashi tsumashon man shinanni samamashta nan yorafo machifo ano icafo man ato rututiro. ⁴²Man ascfiaiton nocon Ifo Diosin ua yoini isca huaquin, “Min caifofo yoihuu ari fononfoma. Uncai ato fu caima. Ascacun mancai nan yora futsafo rutuqui finoanmarocon nan maton noicasmaifoan ato rutushquicaniran,” ishon ua yoini.

⁴³Nan Diosin ua yoini cusca un mato tapimafiaiton man ua nicacasmamisi. Diosin mato yononi cuscari man nicacasmai man shinan manfin caifo futsafo man finontiro. Nanscara shinancatan machifo ano man foni. ⁴⁴Ascano nan Amorreofo machi ano icafo matoqui fuafo. Nan fina ichapaton noyafuran yora tucatiro cuscai nanscarifi ai Amorreofo matoqui fuafo. Seir mai anoshon fasi chaicoín Horma mai ano mato ichonifo. Atirifi mato rutunifo. ⁴⁵Ascano man nasoatian nocon Ifo Diosi man uaishofiaintocai mato nicapainima. ⁴⁶Ascashu man Cades mai ano iyopaoni.

Israelifo fari ichapa tsoa istaipama iyopaonifo

2 ¹Ascan Ifo Diosin ua yononi cusca non unuhuan oshin fai ano tsoa istaipama ano nasoni. Fasi chaicoín non machi Seir tarati huayacuni.

²Ascashon nocon Ifo Diosin afañan ua yoini isca huaquin,

³“Man fasi chaicoín machifo tarati huayacuni. Natian fari oai istafariri fotacahuun. ⁴Min yorafo yoihuun isca huaquin, ‘Maton yora futsafo nan Esaú ahuun funafo man aton mai Seir ano samamashta nocoicai. Ascano nanfo

matoqui ratucani. Ascafia man atoqui nocoaitian oinfain ato ahuusca huayamacahuun. ⁵Ato shinanchacamayamacahuun nanfocai matoqui sinatama mato rutushquicanima. Nan machifo Seir mai anofin atonaquin. Un ato inanni. Ascacun ato fucash huayamacahuun. Uncai aton mai mato inainma. Un Esaú inanni ahuuna non ahuun funafona inon. ⁶Ascacun man atona ahuara piifain ayashon ahuun rafañan ato pui inancahuun,” ishon nocon Diosin noco yoini.

⁷Nocon Ifo Diosin nocohuunoa shinansharaquin non amisi cusca noco sharahuashomisi. Cuarenta fari tsoa istaipama ano non foafanfainni nocon Ifo Diosin no fu cahuacamisi. Noco oinsharafain noco cushusharamisi. Noncai ahuara yopamisima.

⁸Ascatan nocon yora futsafo nan Esaú ahuun funafo nan Seir mai non finonfainni. Arabá faihuuri nan Elat yafi Ezióñ-geber mai anoashucai non canima. Non tsoa istaipama ano cai non Moab fai ari cani. ⁹Non nocoatian nocon Ifo Diosin ua yoini isca huaquin, “Moabitafo fucash huayamacahuun. Nanfofin Lotpan funafoquin. Nannoshon aton mai anunifo Ar. Un ato na mai inanni. Ascacun uncái ato mai mato fustishta inainmaran,” ishon nocon Ifo Diosin ua yoini.

¹⁰(Emitafo nan mai Ar ano iyopaonifo. Nanfo fasi ichapacoin. Mutsisipacoinfo icain nan nocofunu Anac cuya masoa ahuun funafo cuscarafo ini. ¹¹Ascano futsafoan ato anunifo Refaítafofiacun Moabitafoan ato anunifo Emitaforan huani. ¹²Horeofo na mai Seir ano iyopaonifo. Ascano Esaú funafoan ato potani afañan Seir mai ano inonfoma. Nocon Ifo Diosin mani futsafo icanoshon ato potani Israelifo nan mai

inanshquin. Ascatai nocon Ifo Diosin Horefo icanoshon ato potani Esaú funafo nan mai inanshquin. Ascashon Esaú funafoan Horefo rutuqui futsanifo nanfo nanno iishcaquin ato mai inon.)
¹³Ascatan nocon Ifo Diosin ua yoini isca huaquin,

“Natian min caifo yoihuun machi rafu nushmancayan nan shushan ahuun anu Zered pocufainni fotacahuun,” ishon ua yoini. Ascano nan noco yonoo cusca non ani.

¹⁴Ascacun un mato tapimai non Cades-barnea anoashu canitian shushan Zered non pocufainnitian treinta ocho fari finoan ini. Nantian nocofunu iyoafofo Egipcio mai ari focanashu nantifi nai futsunifo. Nannori nocon Ifo Diosin yononi. ¹⁵Nan Diosin nantifi a nocofunufu ato namaqui futsani.

¹⁶⁻¹⁷Ascan nantifi nan yora iyoafo man nai futsunifo Ifo Diosin nantian ua yoini isca huaquin, ¹⁸⁻¹⁹“Na shafata man Moab mai Ar ano finoincai Amonitafo nan mai ano icafo. Ascafia Amonitafo fucash huayamacahuun. Nanfo Lotpan funafoquin. Nan mai un ato inan atona inon. Ascan mancai aton mai fustishta fiantiro. Ascatai ato fu rutunanyamacahuun,” ishon nocon Diosin noco yoini.

3 ²¹Unfin Moisés un Josué yoini isca huaquin, “Na niaifo rafu nocon Ifo Diosin ato nama cusca man min oian. Min mai futsa sharacoin ano nocon Ifo Diosin manifesti ano ato nanscari huaashquin. ²²Ascacun atوقي ratuyamahuun. Nocon Ifo Diosin nanfo mia ato cuyoshoshquin,” ishon un Josué yoini.

**Nocon Ifo Diosicai Moisés Canaán
mai ano iquimanima**

²³Nantian un fasi nocon Ifo Diosi cufini isca huaquin, ²⁴“Uhuun Ifon, min

nantifi iquina. Unfin min oinmatiquin. Min ahuamamishti huatiro cusca huafain min nantifi finoncoian mian tau huaquin ismani. Nai muran iyamarai mai anocai diosi futsa yamai. Min atiro cuscacai tsoa futsan huatiroma. Min curushhuunshon min ahuamamishti atiro cusca tsoa futsa huatiroma.

²⁵Uhuun Ifon, ua nichipun urifi na mai shara unu Jordán ocuma futsa ari nan machi sharafo yafi Libano mai shara un oinon,” ishon un nocon Ifo Dios cufini.

²⁶Un nannori cufiinton nocon Ifo Diosin matohuunoashu uqui sinani ua nicacasmani. Ascashon ua yoini isca huaquin, “Nanscanon. Afanan nanfohuunoa ua yoyimahuu. ²⁷Machi Pisha mamaqui mapuhun. Nannoshon fari iquaiquiri oinfain nan fari oai istafariri oinfain fari cai istafariri oinfain fari oaiquiri ointahuun. Nan mai shara un min caifo Israelifo inannon. Min oinfiaquicai min unu Jordán pocutiroma. ²⁸Min Josué yoitiro afin mia cuscaran maton caifoan aton niaifo inon. Maton caifofo na mai shara ano Josué ato iyoshquin. Ascatan unu Jordán pocufainshquin. Josué tsain shara yoihuun ahuun nomuran unimamahuu. Ascashon yoihuun un mi fu imisi cusca un a fu iishqui uhuunshon ahuun yorafo na mai shara ano ato iyosharashquin. Na mai min oiain Josué min yorafo nan Israelifo inanshquinran,” ishon nocon Ifo Diosin ua yoia.

²⁹Ascano pushu rasi Bet-peor chaimashta nan machifo nushmancayan non nituyoni.

**Moisés Israelifo yoini nocon Ifo Diosi ato
yonoo cusan nica sharanonfo**

4 ¹Uhuun caifofoan ua nicasharacahuun. Nocon Ifo Diosin ua yomisi cusan un natian mato

tapimai man nansca huanon. Nocon Ifo Diosin nocon shunifoan aton Diosiri. Man ahuun tsain nicasharaquin man nisharacain nan mai shara noco inain non nanno iisharanon. ²Nocon Ifo Diosin noco yonoa cusca nantifi nicasharacahuun. Ahuun tsain potayamacahuun. Ahuara maton nomuranshon mafin man shinain cuscan yoiquin isca huayamacahuun, “Nannorifi nocon Ifo Diosin noco yonoaquin,” ishon yoyamacahuun. Un ahuun tsain mato yoya cusca aafin mato yonoa. Nan fusti tanasharacahuun.

³Man man oinni Baal-peor anoshon nocon Ifo Diosin nocon caifo onaintimai cuscan. Nanfoan Baal-peor icanoafoan ahuara rami huafo. “Nan nocon diosiran,” ishon yoinifo. Ascashon rami huashon anunifo Baalran huanifo. Ascano nocon caifo atirifoan yoiquin isca huanifo, “Nan Baal nocon diosiran,” ishon yoiiafofin nocon Ifo Diosin ato onaintimaniquin. 24,000 ato namaquin futsaiton man man oinni. ⁴Ascafia atirificai man nocon Ifo Diosicoin potanima. Nan fusti man icoinra huani. Ascano natamarocon nantianri man nia.

⁵Uhuun yorafoan shinancahuun. Nocon Ifo Diosin ua yonoa cuscan un mato tapimamisi man nicasharanon. Ascan chipo na mai shara nocon Ifo Diosin mato inain man icaitian man ahuun tsain nannoshon man nicasharanon. ⁶Mato yonoa cusca nicasharafain potayamacahuun. Man ascaiton mani futsafoan mato oinquin shinantirofo isca huaquin,

“Nan Israelifo aton nomuran fasi shinansharacani. Aton Ifo Diosin ato yonoa cusca man nicasharacoincaini. Ascan fasi tapisharaforan,” ishon shinanshcaini. ⁷Nan ratoranfoan afi rami huacashon nocon diosiran huamisifo. Nanfocai nocon Diosicoin cuscarafoa.

Nocon Ifo Diosin noco shara huacoinna non nantifi caifo futsafo finoncoian. Non nocon Ifo Diosin cufiainton noco nicamisi. ⁸Nocon Ifo Diosin noco yonoa cusca un mato yoi. Nanton noco yonoa cusca fasi shara. Nan noco yonoa cusca ai non isharacointiro. Mani futsafoan aton diosifocai ascarafoa. ⁹Ascacun oinfain Diosin mato oinmana cusca nanfohuunoa shinaincai man ointiaquimapacunacama. Maton facufo non mato chatafo non maton shotafori nocon Ifo Diosin mato yonoa cusca ato tapimacahuun.

Nocon Ifo Diosin machi Horeb anoshon Israelifo afanan yoini

¹⁰Man machi Horeb tunanmanri nocon Ifo Diosin ointaifin man nanno nia ini. Nantian nocon Ifo Diosin ua yoini isca huaquin. “Nantifi min caifofo Israelifo ichanan huahuu un ato tapimasharanon. Nanfoan ua nicasharafain tapitirofo ahuuscashomain nan mai shara anoshon uhuunoa shinansharafain un ato yonoa cusca nicasharafain aton facufori tapimacanicain. Ascano nanfoan niyocashon ua nicasharatiroforan,” ishon ua Diosin yoini. Nanhuunoari maton facufo tapimacahuun.

¹¹Ascatan machi tunanmanri chaimashta man funi nanno man nia ini. Nantianri machi ano chi uruaino fasi cuyacoin chi urumanhuain naiqui noco cuani. Nai ari coin fisopancoin icaino fasi faquishcoin ini. ¹²Ascano man chii urumanhuan murannoa man nocon Ifo Diosin ahuun oi nican. Ahuun oi nicanfiaquicai ahuun caya man oinnima. ¹³Nan mato yononi cusca ahuun yorafo man inon mato yoini. Nan shinain cuscahuunoa nan mucu rafuti mato yononi cusca man nica sharanon. Nan mucu rafuti mato yononi cusca

toquiri sapa rafuqui mato cunushoni.
¹⁴Nantianri nocon Ifo Diosin ua yoini isca huaquin, “Chipo min caifofo nan mai shara un ato inain nanno iishquicani. Ascano ahuuscashumain isharatirofoquin un ato yonoi. Ascacun un mia tapimayoi min ato yoinon ua nicasharanonfo,” ishon nocon Ifo Diosin ua yoini.

Nan dioscoinfoma man ifohuaino fasi musucoin itiroran ishon ato yoini

¹⁵Diosin mato yoiatiancai machi Horeb anoshon ahuun caya man oinnima. ¹⁶Ascacun oinfain. Ahuara futsafo rami huayamacahuun. “Nanfo, nocon diosiran,” ishon yoiyamacahuun. Nocofunu iyamaraiyainfo ointsa rami huayamafain ¹⁷yoina ointsa iyamarai ina ointsa rami huayamafain puiya ointsa rami huayamafain ¹⁸ahuara naman sharaifo non shiman ointsa rami huayamacahuun. Nanfo nocon diosiran ishon yoiyamacahuun. ¹⁹Ascatai nai ari oinquin fari non oshu non fishifo, “Nanfori nocon diosifo non ato cufinon,” ishon anori shinanyamacahuun. Nanfofin nocon Ifo Diosin oni huaniquin nan yora manifoti icanoafo ato chashasharashonon. ²⁰Ascan manfin Egipcio mai anoashu fasi omitsiscaiton nocon Ifo Diosin mato numaniquin ahuun yorafo man icain ahuuna man inon. Icon natian man ahuun yorafo ahuuna man man ica. ²¹Ascfia matohuunoashu nocon Ifo Diosin uqui sinaquin ua yoini uncái unu Jordán mato futan pocufaintiroma nan mai shara mato inanshquaiainocai un mato fu ano iquitiroma. ²²Unfin nuquirinoashu chipo naicai. Uncái unu Jordán pocutiroma. Ascan manfin pocutiroquin nan mai shara ano fiishcaquin matona inon. ²³Diosin mato yononi cuscan man aifin ahuun yorafo

man iishquicain. Nan mato cushusharanon. ¡Ascan oinfain! Mato yonoa cusca potayamacahuun. Diosin mato yoini ahuafo rami huayamacahuun maton diosi inon. Ascan man ahuafo ointsafu rami huashofin man Dioscoinfu potaiquin. ²⁴Nan maton Dioscoinfu aru fusti mato Ifo ipaiquin. Aafin chii urumanhuan cuscaraquin. Tsoan ahuun tsain shara cachiquiri huacoincun ato chii urumanhuan muran potashquin amurannoashu omitsiscapanon.

²⁵Ascano na mai shara ano man fari ichapa ini. Maton facufu yafi maton shotafu non maton chatafoyashon man chaca huacun ahuafo ointsa man rami huashon nan man cufiainton. Diosin mato oin man chaca huaiton. Nanscaquin nocon Ifo Diosin man sinanamai. ²⁶Ascatai un mato yoi nai murannoafu futan mai anoafu un nicaino un mato yoi man chaca huacun nan mai shara Jordán ocuma futsa foashucái afanan ano man chai nipatiroma. Nocon Ifo Diosin mato namaquin futsashquin. ²⁷Man chaca huacun mato maifoti pashcanan huai. Nocon Ifo Diosin mato maifoti nichifiaqui mato fusti rasi nitun huatiro. ²⁸Man mai futsa ano icaitian aton dioscoinfu nan ihuihuunoa iyamarai toquirihuunoa ahuafo ointsa rami huafo. Nanfoancai ointiroma icain nicatirofoma icain pitirofoma icain shututirofoma. Ascfia nanscarafo yora futsafoan ato cufiain cusca marifi ato futan man cufinshquin.

²⁹Ascfia man mai futsanoshon nocon Ifo Diosi afanan chaca huatama aqui nasopaicoinquin. Maton nomuranshon shinancoin. Man a fu rafupaicoinquin. Man ahuun tsain nicacoian cusca man ascaifin afanan nocon Ifo Diosi fu man rafutiroquin. Man ascaino afanan Diosin

mato fu iishquin. ³⁰Man omitsiscaitian afanan man nocon Ifo Diosiqui nasoshquin nan nicasharashquin. ³¹Man nanscaiton nocon Ifo Diosin matohuun ramapaicain mato potaima. Maton shunifo yoiyoni cusca mato potapacunacama. Nancai mato ointiaquimapacunacama.

³²Nocon Ifo Diosin yora tauhuaquin oni huani chain mato sharahuashomisi cusca tsoancai nicayomisima. Man nantifi yocatirofiacai tsoancai anori nicamisima.

³³Mancai nocon Ifo Diosin ahuun oi chii urumanhuan murannoa nicafiashu naanima. Aafin natian man nia. Rato mani futsafoancai man nica cusca nicamisifoma. ³⁴Upa Diosin mato ashomisi cuscacai ahuara rami huafoan mato ashotiroma. Upa Diosin mato Egipcio anoshon iyoni. Futsafoan mato chaca huafiaiton Diosin mato numa. Aafin mato ahumamishti ismapaoniquin. Aafin mato oinmamisiquin ahumamishti huatiroshaquin. Tsoa futsa atiroma cusca nocon Ifo Diosin mato ismamisi. Nantiffain man man oinmisiquin. Man ahuara rami huatocai Diosin mato ashomisi cusca mato ashotiroma.

³⁵Nocon Ifoan nan cuscarafo mato oinmana man tapinon arus fusti Diosincoin. Diosi futsa afanan yamai.

³⁶Nai muranshon ahuun oi mato nicamani mato tapimashquin. Ahuun chii urumanhuanhuunshon mato mai futsa ano ismani nan muranshon mato yoini.

³⁷Maton shunifo fasi noicoinquin matorifi shara huashomisi. Aafin ahuun curushhuunshon mato Egipcio mai arishon mato ihuuni. ³⁸Caifo futsafoan mato fasi finonfiacun nocon Ifo Diosin aton mai anoshon ato potani aton mai mato inanshquin matona inon. Natianfin na mai shara matonaquin.

³⁹Ascashon maton nomuran shinancoinfain

ointiaquimamayamacahuun. Nan Diosi icanoafo arusu fusti aton Diosi icain arusu fusti aton Ifoquin. Ascatai nan mai ano icafoan aton Diosiri. Afanan futsa yamai. ⁴⁰Un na shafata Diospan tsain mato yonoa cusca man nicasharaino maton facufoya man isharatiro. Man ascaino nan mai shara nocon Ifo Diosin mato inanpacushquin nannofin man ipatiroqiran, —ishon Moisés Israelifo yoini.

Diosin nantifi yononi noinanonfo

6 ¹—Man samamashta nan mai shara nocon Ifo Diosin mato inainno man iquishquin matona inon. Ascan man iquiataima nocon Ifo Diosin mato yonoa cusca ua yoia un mato tapimanon man nocon Ifoan tsain tanasharanon.

²Ascano maton facufo non mato funafori man niyoshon nocon Ifohuunoa shinansharafain man ahuun tsain nicashara. Mato yonomisifoti man nicasharacun mato chai niimapacutiro.

³Uhuun yorafo Israelifoan un mato yoiai cusca nantifi nicasharacahuun. Man nica cusca nantifi acahuun. Man ascaiton nan mai shara ano man facu ichapa ayashcaquin. Nannocai man ahua yopashquima. Maton shunifo nocon Ifo Diosin yoiyoni cusca nannori matori yoiyoni.

⁴Nicacapon Israelifoan, nocon Ifon Diosifin nocon Ifo fustiquin.

⁵Nocon Ifo Diosi maton shinanhuunshon fasi noicoinfain maton nomuran fasi noicoinfain maton curushhuunshon fasi noicoincahuun.

⁶Un na shafatan mato yonoai cusca yoihuun isca huaquin, “Nocon Ifo Diosin ua yonoa cusca shafatifi un ashoincain. Uncai ahuara futsa shinanshuimaran,” ishon maton nomuran nannori shinancoincahuun.

⁷Maton facufo Diospan tsain shafatifi

yoifafaincahuun. Maton pushu muranshon nocon Ifo Diosin mato yonoa cuscahuunoa ato yoicahuun. Nan fain caaquin yoifain nantianri afohuunoa yoifain racashon yoifain man funiaitianri ato yoifafaincahuun.

⁸Diospan tsain maton mucuqui munushumucain mato fumananquiri funushumucahuun afo ointiaquimashcaquima. ⁹Diosin mato yonoa cusca maton pushu shoi caincaiti ocuma rafu ahuun tsain cunucahuun.

—Nocon Ifo Diosin mato yonoa cusca acahuun, —ishon Moisés Israelifo yoini

¹⁰Nocon Ifo Diosin nocon shunifo Abraham non Isaac non Jacob yoiyoni mai shara ato inanshquin. Samamashta na mai ano mato iquimashquin. Nannocai pushurasi uhuapa sharafo man huama. ¹¹Yora futsafoan aton pushu rasi ano tushu shara ichapa nanfocai man fanama. Nannori pozofa manricai aton quini huashonima. Aton fimifo nan uva yafi olivofocai man fanama. ¹²Ascacun oinfain. Mayancoinshocai afanan ahua man yopaima. Ascacun nantian nocon Ifo Diosi ointiaquimayamacahuun. Man Egipciofoan ato yonomati iyopaonitian nocon Ifo Diosin mato numani aton mai arishon nuno mato ihuua.

¹³Ascan nocon Ifo Diosi fusti icoinra huacahuun. Mato amapaiyai cusca shafatifi acahuun. Man futsa yoiai cusca mato icoinra huanon nocon Ifo Diosi ahuun anuhuunshon yoicahuun. Tsoa futsa ahuun anuhuunshon yoiyamacahuun mato icoinra huanon. ¹⁴Mani futsafo mato chaima icafoan afi rami huacashon uhuun diosiran ishon rami huafo tanayamacahuun. ¹⁵Nocon Ifo Diosin mato fu ica. Arus fusti mato Ifo itiro. Man ahua futsafo man ifoaino Diosin matoqui sinashquin. Nan mai shara anoshon mato cuyoshquin.

¹⁶Masah mai anoshocai man nocon Ifo Diosi icoinra huacoinnima. Nannoshon man yoini, “Nocon Ifo Diosi no fu ica iyamarai no furaca icama,” ishon man yoini. Afanan asca huayamacahuun.

¹⁷Nocon Ifo Diosin nantifi mato yononi cusca nicasharacahuun. ¹⁸⁻¹⁹Nocon Ifoan shinan cusca marifi nanscara shinacahuun. Ahuara cayacafi shara fusti acahuun. Man asca huaion na mai shara ano man isharacain ahua chacacai matoqui nocoima. Nocon Ifo Diosin nocon shunifo yoiyoni cusca aton mai inanshquin. Ascano man nocon Ifo nicashara na mai shara ano man iquitiro. Mani futsafo nannoshon man potatiro matona nan mai inon. Nannori nocon Ifo Diosin yoini.

²⁰Chipo maton facufoan mato yocaquin isca huai, “¿Nocon Ifo Diosin noco yononi cusca ahua noco yoipaimun?” ishon mato yocaifoan.

²¹Ato cumaquin isca huacahuun, “Nonfin Egipciofoan aton niaifo Faraón ahuun yonomatifo ipaoniquin. Ascacun nocon Ifo Diosin ahuun curushhuunshon ato mai arishon noco ihuuni. ²²Nantian non oinni nocon Ifo Diosin ahuamamishti tsoan ascara oinyomisima cuscara noco ashoni.

“Ascan nanfohuunoashu Egipciofo fasi omitsiscani. Aton niaifo Faraón fasi omitsisca huafain ahuun yorafori nantifi nocon Ifo Diosin ahuun curushhuunshon ato omitsiscamani.

²³Ato ascahuatan Egipcio mai anoshon noco ihuua nan mai shara noco inanshquin. Nan mai nocon Ifo Diosin nocon shunifo ato yoiyoni cusca ato inanshquin. ²⁴Nocon Ifo Diosin noco yoini isca huaquin, ‘Nantifi un mato yonoa cusca acahuun. Man asca yamaino musucain itiro,’ ishon noco yoini. Nocon Ifo Diosin noco yonoa cusca non aiton noco natian non ishara

cusca nocon Ifoan noco
nimasharapacunacaquin. ²⁵Nocon Ifo
Diosin noco oiainno non
shinansharafain noco yononi cusca non
afafainshquin. Nanscashu non ahuun
yora shara itiroran,” —ishon Moisés
ahuun caifo yoini.

**Nocon Ifo Diosi noifain mato
yona cusca acahuun**

11 ¹Maton Ifo Diosi noicoincahuun.
Mato yona cusca nantifi
nicasharafafaincahuun. ²Un natian mato
afanan shinanmanai cusca maton
facufoancai oinyomisifoma. Nocon Ifo
Diosin mato tapimani cuscacai tsoa
futsan muumisima. Nan ahuamamishti
atiro cuscacai tsoan oinyomisima.
Ahuun curushhuunshon noco ashopaoni
cuscaricai tsoan oinmisima. ³Egipcio
mai ano tsoan oinyomisima cuscaran
nocon Ifo Diosin noco ismani. Ahuun
curush noco ismaitian nanfohuunshon
niaifo Faraón yafi nantifi ahuun caifoyo
omitsiscamani. ⁴Egipciofo aton
ranushumuafoya aton caballo
taramutiyafoan mato mufainifo mato
achipaifoan nocon Ifo Diosin nantifi ato
unuhuan ahuun anu oshin muran ato
asamafain nantifi Egipciofo nocon Ifo
Diosi ato chaca huaquin ato cuyoquin
rashquini.

⁵Tsoa istaipamashon nocon Ifo Diosin
mato ashopaoni chaincai man nuno
nocoaitian maton facufoan ascarafo
oinyomisifoma. ⁶Nocon Ifo Diosin Eliab
facu rafu nan Rubén ahuun funafo
Datán yafi Abiram onaintimani cusca
nan mai fupucuriscatanaino nan rafu
yafi aton yorafoya non aton pano
pushufo non aton inaforti ato fu mai
muran pacunifo. Nan main ato shuai
cafisca huatanaino nai futsunifo.
Nanscaifoan nantifi nocon yora
Israelifoan oinnifo. ⁷Man oinmisi

cuscacai maton facufoan oinmisifoma.
Nantifi nocon Ifo Diosin mato shara
huashoni cusca man oianfo. Nan tsoan
oinyomisima cuscaran shara mato
ashomisi man oian.

**Man nocon Ifo Diosi nicasharacun nan
mai shara anoshon mato shara
huashoshquin**

⁸Ascan nocon Ifo Diosin noco yona
cusca un mato tapimaicai nantifi
nicasharacahuun. Man ascaiton Diosin
mato mutsismashquin man unu Jordán
pocufain nan mai shara ano man iquicai
matona inon. ⁹Nocon Ifo Diosin nocon
shunifo yoini nan mai shara atona icain
aton funafonari iishquin. Nanno mai fasi
shara yonofa foaisharatiro ini. Nan
ratora futsan nanno icashucaí ahua
yopatiroma. Man nocon Ifo
nicasharacun nanno man chai
ipasharatiro. ¹⁰Nan mai sharacai
Egipcio mai ariashu man fua cuscarama.
Egipcio ano man mau muchana
huapaiquin man unu fipaoni maton mau
muchana huashquin maton yonofa
foaisharanon. ¹¹Na mai shara ano man
caicai Egipcio mai cuscarama. Nanno
machi ichaparasi. Nannoashu oi ichapa
fumisi mai muchana huashquin. ¹²Nan
maifin nocon Ifo Diosin cushumisi
sharamisiquin. Faritifi non shafatífiri
oinfafainni.

¹³⁻¹⁴Ascano na shafata nocon Ifo
Diosin mato yononi cusca un mato
tapimana man nicasharafafainon. Man
nocon Ifo Diosi maton ointi muranshon
noifain maton nomuran man fasi
noicoiaiton Diosin nan mai shara
anoshon mato shara huashquin.
Nantianri oi fumashquin nan oi fuaino
mato fanafo foaisharanon. Maton fasi
ushu foaisharacain maton uvafo
foaiquin sharano ahuun unu ayafain
nan olivofori foaisharano man shuni

ichapaya itiro. ¹⁵Nocon Ifo Diosin yonoai cusca maton pasto funiaiton mato moifoan piisharatirofo. Nanscarifi aqui marifi maton mau shara icano unimacai man piisharatiro. ¹⁶Ascafia oinfain! Futsafoan mato chaca huamapai. Aton dioscoinfoma rami huafo atohuun noiquin ratoconun mai chachishon ato cufiainfoanno. Marifi afo cufinyamacahuun. ¹⁷Man afo cufiainno nocon Ifo Diosin matoqui fasi sinai. Afanancai mato mauqui oi fumaima mai mutoano mato fanafocai foaisharashquima. Marifi man samamashta na mai shara anoashu man cuyoi futsushquin.

¹⁸Un mato nocon Ifo Diospan tsain tapimana cusca maton nomuran shinancoinfafaincahuun mato yonoa cusca aashcaquin. Nan maton yonoa cusca cunucahuun maton mucuqui munushumucain maton fumananquiri funushumucahuun ointiaquimashcaquima. ¹⁹Maton facufori tapimacahuun. Maton pushu muran tsaoshon nocon Ifo Diosin mato yonoa cusca yoifain fain caquin yoifain racashon yoifain nan man funiaitian maton facufo yoicahuun. ²⁰Maton pushu shoi caincaiti ocuma rafu nocon Ifo Diosin mato yonoa cusca cunucahuun. ²¹Man nansca huaifin maton facufo fu nan mai shara ano man chai ipatiroquin. Nocon Ifo Diosin nocon shunifo yoini cusca marifi na mai shara ano mato inannon nanno man ipacunaca.

²²⁻²³Nocon Ifo Diosin noco yononi cusca un mato yoia. Ascacun nicasharafain man tanasharashon nocon Ifo Diosi noicoinfain. Nan amisi cusca marifi man nanscaifin man a fu rafupacunacaquin. Nantifi mani futsafo nan mai shara ano icafo nocon Ifo Diosin mato potashoshquin nanno

matona inon. Nan caifo futsafo mutsisipafo mato finonfiacun nocon Ifoan ahuun curushhuunshon man ato potai nanfo afanan nanno icamarocon manfin nanno iishquicain. ²⁴Man puamana ano nantifi na mai matona iishquin. Nan tsoa istaipama Líbano anoashu chai unu Eufrates chai ununhuan fari iquaiquirinoa ano nantifi nan mai matona inon. ²⁵Man na mai shara ano nocoatima mato yoiyoni cusca nocon Ifo Dios matohuunoa mani futsafo matoqui ratumafain matoqui fasi musucani. Ascan nantifi na mai man fiiaino tsoancai mato nitu huatiroma.

²⁶Na shafata un mato yoiai cusca mafi man catontiro nocon Ifo Diosin man tanasharaiton mato shara huanon iyamaraimain man tanayamaiton mato onaintimashquin. ²⁷Na shafata nocon Ifo Diosin mato yonoa cusca un mato tapimai man nanscocioainton mato shara huashquin. ²⁸Ascafia nocon Ifo Diosin mato yonoa cusca un mato tapima man cachiquiri huaiton caifo futsafoan aton dios rami huafo man cufiainton nocon Ifo Diosin mato onaintimashquin.

²⁹Ascan maton Ifo Diosin nan mai shara ano mato iquimanaitian matona iquin. Nantianri atirifi machi ahuun anu Gerizimcamaqui mapucahuun nocon Ifo Diosin mato yonoa cusca man aiton mato shara huashoain cusca oi ashcafinin yoicahuun.

Ascatairi atirifi machi ahuun anu Ebal camaqui mapucahuun nocon Ifo Diosin mato yonoa cuscacai man aima nan mato onaintimai cuscari oi ashcafinin yoicahuun. ³⁰Nan machi rafu unu Jordán fari iquaiquiri pushu rasi ahuun anu Gilgal chaimashta. Nannori ihui ahuun anu encina ichaparasi nan ihui chaimashta anunifo More. Nannori Cananeofo na machi rafu ano icafo.

³¹⁻³²Man samamashta unu Jordán pocufainnicai nan mai nocon Ifo Diosin mato inanno nanno man iishquin. Nanno man icaitian nantifi nocon Ifo Diosin mato yonoa cusca un na shafata mato tapimai man nansca huapacunaca. Nan mato yonoa cusca nantifi nanscacoinecahuun.

**Israelifoan Diosi tanasharashu
isharashcaquin**

30 ¹¹Nocon Ifoan noco yonoa cuscacain curushma. Manfin atiroquin. ¹²Diosincainai nai muranshon mato yonoama man nicanonma. Nanscaraquin man yoca cuana isca huaquin, —éTsoanmun nai muran Dios icano catiroquin nocon Ifo Diosin noco yonoa cusca nicashu nasocuratiro nocori tapimashquin noco yonoa cusca non anon? —ishoncai anori man yoitiroma.

¹³Ascataricai ununhuan ocuma futsashori nocon Ifo Diosin mato yoiama man nicanon. Nanscaracufin man yocacuanaquin isca huaquin, —Tsoanmun ununhuan pocufaitiroquin nocon Ifo Diosin noco yonoa cusca non nicanon. Ascashu afanan nocoqui nasocuratiro norifi non nicasharanon noco yonoa cusca non huanon, —ishocai man anori yoitiroma.

¹⁴—Ascatamarocon nocon Ifo Diosin mato yonoa cusca man aya. Mato yonoa cusca man yoitiro. Maton nomuranshon mato yonoa man man tapia. Nan mato yonoa cusca man anon, —ishon Moisés ahuun caifo nan Israelifo yoini.

¹⁵—iNicapon! Na shafata un mato yonoa cusca man catontiro man isharaicai man ahua yopashquima. Iyamarai man isharayamaino man nai cuyoshquin. ¹⁶Un mato yonoa cusca nocon Ifo Dios noicoinfain mato yonoa cusca nantifi nanscacoinecahuun. Diosin

mato amapaiyai cusca man aiton mato shara huashoshquin manfin yora ichapacoin caiishquicain. Na mai shara ano matona iishquin. ¹⁷⁻¹⁸Ascafia maton nomuranshon nocon Ifo Diosihuunoa man afanan a shinanyamafain man nicacasmatan caifo futsafoan aton dioscoinma ramihuafo man ratoconun mai chachishon nan cufinshcaquin man asca huaiton un na shafata mato yoi iconcoin man nai futsushquin. Man unu Jordán pocufainnicai nan mai ano iquishcaquin. Ascafia man nocon Ifo Diosi nicasharayamaiton nannocai man chai ipatiroma.

¹⁹⁻²⁰Na shafatan un mato yoiyai cusca nan nai murannofo nocon Ifo Diosi fu icafoan nicaino yafi mai ano icafoanri nicaino un mato cayacafi yoiyai cusca man catontiro man niisharatiro iyamarai man nai futsushquiai cusca man catontiro. Nocon Ifo Diosimain mato shara huashoshquin iyamarai mato chaca huashquicain. Natian uhuun yorafoan man niyoatian isharacahuun. Maton facufoya niisharacain nocon Ifo Diosi noicoinfain a nicasharafain a fu rafufafaincahuun. Nocon Ifo Diosihuunoashufin man niisharatiroquin. Upa Diosin nocon shunifo Abraham non Isaac non Jacob yoicoinni na mai shara ato inanshquin. Nocon Ifo Diosin matori na mai shara ano mato chai imasharashquinran, —ishon Moisés ato yoini.

**Moisés ipaoni cuscan Josué Israelifoan
aton niaifo iishquin**

31 ¹Ascano Moisés nantifi Israelifo yononi cuscan anaititan afanan ato yoini isca huaquin,

²—Natian un ciento veinte fariya. Nanscashocai un afanan mato iyosharatiroma. Ascatare nocon Ifo Diosin ua yoiyai isca huaquin, “Mincai

unu Jordán pocufaitiromaran,” ishon ua yoya. ³Ascano nocon Ifo Diosin aafin mato fu rucu cai. Nantofin caifo futsafo cuyoshquiquin. Ascanofin man aton mai ano iishquicain matona inon. Ascatari nocon Ifo Diosin yoya cuscari Josué mato niaifo iishquin mato ointaifin rucu unu pocufainicai. ⁴Ascano caifo futsafoan mato rutupaiyaiton nocon Ifo Diosin Amorrefo aton niaifo rafu Sehón yafi Og ato yorafoya cuyoni cusca na caifo futsafori nanscari huai. ⁵Nocon Ifo Diosifin ato nansca huashquiquin man ato cuyonon. Ascacun un mato nantifi yonoa cusca ato nansca huacahuun. ⁶Nocon Ifo Diosin mato fu cai matocai potapacunacama mato fu icacainshquin. Ascano nocon Ifo Diosin ahuun curushhuunshon mato amapaiyai cusca huafafaincahuun. “Nocon Ifo Diosin noco yonoa cusca non huatiroran,” ishon shinancahuun. Nan caifo futsafoqui musuyamacain atoquei ratui taritariyamacahuun, —ishon Moisés ato yoini.

⁷⁻⁸Ascatan Israeliffoan aton ointaifin Moisés Josué cunani yoiquin isca huashquin, —Nocon Ifo Diosin afin mi fu rucu cacain mi fu iishquin. Miacai potapacunacama mato fu icacainshquin. Nocon shunifo nocon Ifo Diosin yoini mai shara ano ato inanshquin. Nocon shuniffoan ato funafo nan mai shara ano iyoshquin. Ascatari a mai pashcanan huai matona inon. Ascacun ahuun curushhuunshon mia amapaiyai cusca huafafainhuun. Shinanquin isca huahuu, “Nocon Ifo Diosin ua yonoa cusca ahuun curushhuunshoun un atiroran,” ishon shinanhuun. Caifo futsafoqui musuyamacain shinanquin isca huayamahuu, “Nocon Ifo Diosin ua yonoa cusca un atiromaran,” ishon nannori shinanyamahuu, —ishon Moisés Josué yoini.

Moisés nataima nocon Ifo Diosin na mai shara oinmani

32 ⁴⁸Nan shafata nocon Ifo Diosin Moisés yoini isca huaquin,

⁴⁹—Machifo fari oaiquiri mai Moab ano catahuun. Nanno nan machi ahuun anu Nebo ano mapuhuu. Nebo pushu rasi Jericó ocuma futsa ini. Machi Nebo mamaquinoashu mai Canaán ointahuun. Naan mai maton yora Israelifo un ato inanshquin atona inon. ⁵⁰Nan ointan man min nai. Min ochi Aarón machi Hor mamaquinoashu nani cusca maton shunifo fu iishquin minrifi na machi Nebo mamaquinoashu min nai min shunifo fu iishquin. ⁵¹Mato rafu unu Meriba-cades anoshon un mato yononi cusca maton yorafoan aton ointaificai man anima. Un fasi sharacoincucai man ato ismanima. ⁵²Ascano na mai shara un min caifofo inain anocai min iquitiroma. Ascafia nan machi Nebo camaqui chaicushon fusti min ointiroran, —ishon nocon Ifo Diosin Moisés yoini.

Moisés nani cuscan

34 ¹Ascatan Moisés tsoa istaipama Moab anoashu Jericó ocuma futsa machi Nebo maputan machi tuscu futsa Písga mamaqui noconi.

Nannoshon nocon Ifo Diosin Moisés oinmani nantifi nan mai ahuun caifofo inanshquiain. Galaad anoshon chaicoin Dan mai nantifi nan maifoti oinni.

²Nantifi mai Neftalína oinfain Efraín yafi Manasésna oinfain nantifi Judápan mai chai ununhuan Mediterráneo ano oinfain ³Néguev mai oinfain Jericó nanno shufu ichapafo nan mai mispa anoashu chai pushu rasi Zoar icano Moisés oinni. ⁴Nantifi oinmatan nocon Ifo Diosin Moisés yoini isca huaquin,

—Nantifi nan mai min oian cusca un min shunifo Abraham non Isaac non

Jacob un ato yoiyoni nantifi nan mai un aton funafo inanshquin. Un mia ano iquimayamafiamisishaquin natian un mia oinmanaran, —ishon nocon Ifo Diosin Moisés yoini.

⁵Nocon Ifo Diosin yoini cusca Moisés nan nocon Ifo Diosin ahuun oinmati nan Moab mai anoashu nani. ⁶Nan machi rafu nushmancayan Moab ano nan pushu rasi ahuun anu Bet-peor chaimashta nocon Ifo Diosin Moisés mai huani. Ascfia ranimain mai huaniquin tsoancai tapiama. Natianricai tsoan tapiama. ⁷Moisés ciento veinte fariashu naani. Naitiancai ahuun furo rafu mata inima. Oinsharacoinfain ahuun cayari pushco cuscaran mutsisipacoin muuni. Nanscarashu Moisés nani.

⁸Ascano Israelifoan nica Moisés natian aton fuyamisi cusca oshu fusti machi rafu nushmancayan Moab mai anoshon manonifo. ⁹Nataima Moisés Josué

manmanni Diospan Yoshin Shara Josué fu rafucacainno nan fasi tapimasharanon. Ascano nocon Ifo Diosin Moisés yononi cusca Josué Israelifo yoiaiton nan nicasharanifo.

¹⁰Nan Moisés Diosin tsain yoimisi cuscaracai afanan tsoan imisima. Diosin fu Moisés oinonanpaoni a furi tsainpaoni. Tsoan futsacai Moisés cuscara Diosi fu tsainmisima. ¹¹Nocon Ifo Diosin Moisés Egipcio mai ano nichini Diosihuunshon ahumamishti tsoan oiyomisima cusca niaifo Faraón yafi nantifi ahuun caifofoan oinonfo.

¹²Nanscarifi ai Israelifoan aton ointaifi nocon Ifo Dioshuunshon Moisés ahumamishti tsoan oinyomisima cuscara ato oinmafain nocon Ifo Diosin ahuun curush Moisés huunshon ato ismaino yoinifo isca huaquin, —iOincapon! Tsoancai iscara oinyomisima, —ishon yoinifo.